

舊篇四

郾城縣記第二十一

楊琳 子旦 旦孫繼芳 繼芳子益智 旦曾孫益普

旦玄孫榮 榮子履吉 觀吉 旦六世孫臨吉

徵吉 履吉子思穎 觀吉孫樵 旦八世孫固猷

旦十一世孫天健 旦十二世孫聯芳 朱臣 陶禮

劉用中 張九德 靳廷裕 裔孫丹秀 丹秀子大成

大成子垵 王文章 何述 趙文煥 五世孫大韶

大韶子源生 源生孫桂森 桂叢 桂叢子時賡

時熙 胡綿 六世孫中元 陶汝弼 族孫鐸 鐸子聖

謨 聖謨子光顯 光顯孫敬身 謝紹先 沈尙賢

王士表 陳際昌 張經畫 高翀 張有典 李

啟愚 宋賜畫

子弘儒

譚允衡

李豫

弟賁

賁子

琮

豫八世孫懷西

振聲

李珍

李發愚

孫鉅

裔孫春和

楊琳字彥珍號松侶幼而穎敏志氣不羣母蚤亡事繼母以孝聞父歿家貧繼母以爲憂琳曲意承顏尺布一錢皆繼母裁其出入施於外事無巨細必告而後行繼母視之逾已出焉明正德庚午以貢生入國子監監某生以銀十兩偕琳藏隱處地近鼠穴鼠齧紙破銀墜入穴某取銀銀亡告之同舍咸意琳竊琳言笑如恆不辨解橐償之齋夫

乃不平徧掘地得銀於鼠穴同舍與某皆愧謝終無所言
任徐州訓導士服其教儒學充齋夫者例輸銀學官夫某
輸時色慘然詢之鬻女直也還所輸銀俾贖女歸生平守
官接物恆以天理爲言教子孫戒其傲而勉以謙不僅僅
文藝之程期之篤於踐履云子旦

旦字啟東號中泉少爲文有奇氣正德辛巳進士初授吉
安府推官擢刑部主事調戶部嘉靖辛卯轉兵部咸有聲
公署災延燒什器儲峙謫河間府推官居一年轉同知未
踰年擢工部郎中明年授西安府知府未任而卒旦孝友
聞於閭里自推官七轉至知府歿後家無長物惟藏書千

餘卷聞者歎息焉

繼芳字美傳旦之孫博學直行貧者衣食之門下多登甲乙榜者繼芳萬厯時以貢生任歸德府訓導董河工民舍妨工者以已貲償其遷費庠生鄧仗策家娶子婦遇邪歸則兩婦雖其女家父母不能辨繼芳爲文禱於神以驅之妖遂絕時寧陵乏令監司以繼芳攝之辭遷濟南府教授不赴歸弟子益集家居三十餘年不復出云第三子益智益智字叔愚少負才名文章贍麗萬厯戊午舉於鄉雅志孝養不以進取爲務性豪邁飲酒至一石不亂焉

益智字恆省一字旭齋旦之曾孫順治時歲貢生遂於見

晚年說經於里門邑士從遊者咸却其贄著書以終

榮字文饒旦之玄孫增生性慷慨好義行崇禎之末流寇氛逼買舟南去避之舟行有過其側而號泣者問之負債於人已以女償之矣聞而惻然出橐中裝如其所負數予之使贖女歸邑西郭中嶽廟側有地兩段二十八畝瀕行盡施於廟而去子履吉觀吉

履吉字祥元號素庵康熙戊午舉人任甯陵澠池教諭訓課甚勤甲午爲山西同考官所拔皆知名士乙未冬卒於甯櫟歸里時士民布奠相扶而送之至郛城者十餘人號泣卒事

觀吉字奇生恩貢生工制義教於其族持師道至嚴有不
率教者懲之不少寬假族之子弟勤於學而有成者皆其
力也

臨吉字莊生厚重寡言遇材質駑下者憐惜哀惋根於仁
心未嘗輕棄之焉

徵吉字瀛侶號敬勝剛毅有執樂施予晚年究心音韻著
有成書臨吉徵吉於旦爲六世孫縣皆舉之與於鄉飲
履吉子思穎字敏公博學能文邑人皆推重之著述甚富
惜多散佚存者十二三云

觀吉孫樵字寄山號牧齋入歲而父思溫卒哭泣盡禮如

成人幼不好弄自束髮受書必端立正坐不跛倚作字必端楷雖爲文屬草亦未嘗減筆畫爲俗體制義必師先正若歸胡若金陳若熊劉非是則不讀雍正壬子乙卯兩得錄爲副貢生任柘城教諭者八年居官不阿時好不至佐雜之庭訓士嚴而有恩尤軫念乎寒賸致仕歸柘城人士感之立石以表其德於其卒也祀之於名宦而柘城志爲之傳

固猷字聖勳武生旦八世孫雖入武學而善屬文以蚤歲應童子試不見錄易而習武然恆自悔生平不言弓馬事而教人爲文人亦以其夙能文也競從之遊故列其門牆

者乃盡爲文學之士焉

天健字子乾旦十一世孫也性純孝喜讀史鑑年逾七十問寢視膳之餘仍自手不釋卷以歲貢生候選訓導終病革時示子姪曰貧非病不讀書真病也端坐而卒

聯芳字棟堂旦之十二世孫也幼聰穎甫學語卽晨夕隨其祖祖教以千字文日能誦二十餘字試顛倒其次第以問之又能隨問以答故事歲之元日縣署前結彩召俳優爲劇誌慶人民得縱觀其祖以帶束聯芳於背以往有頃置於隸舍前之石几曰吾去卽返勿動勿唬也聯芳仰見門旁春聯喃喃誦且語一老人過詫曰汝誰家兒時僅告

以姓而未能言名老人喜贈以手中蔗年十八學爲文於
安法曾邑所號爲魯齋先生者也一見大器之是年應學
政試以經古冠許州五屬入學爲生員又二年補廩膳生
家貧因授徒自給然鄉試終不得一第以歲貢生終生平
篤於師友之誼法曾亡聞而奔赴匍匐號咷盡哀見者爲
之傷臨友朋之喪每泣不可仰晚年得有傳譯歐美之書
一見而能明其癥結欲以經史之旨是正而疏通之未竟
而卒而詩歌每爲邑人傳誦焉

朱臣字時卿號默庵正德十六年貢禮部謁選曹不願仕
除陽穀縣丞不赴旣歸於所居之南構精舍以易授子姪

名利聲華泊如也文廟帛篋敝臣自爲篋藏之廟久之始有知者

陶禮字大用明正德時任湖州稅課司大使致仕歸性質直不事繁縟末節然其母歿時禮年已七十矣執喪則皆中禮劉用中不積私財三十年足不履市惟結廬以課子子皆成名文篆生員文箴順治時歲貢生用中年至八十二人者先後百餘年間最推篤行不假標異物望自歸咸以宿德屢與鄉飲焉

張九德幼純謹不好弄少長恭勤慎默父魁爲揚州訓導患瘍久不瘥九德勸之歸日侍湯藥未嘗離越二歲疾亟

九德與弟九經百方療之不愈竊刲股以進父疾竟瘳知縣喬遷親至其家驗之餽以酒肉復其家知縣楊伯謙奉詔書事例欲起部聽用九德辭以母老且未學不任用又舉鄉飲亦不赴署知縣楊邦梁旌曰孝子之門年至七十未嘗與人爭訟教二子力田孝友迨順治時知縣荆其惇修葺縣志旣書其事因而論之曰九德至誠懇惻非殘肢體以逃租庸者

靳廷裕居城北孟莊與弟廷祿白首同居門以内老穉無違言沙埠口受土壩河衝地勢下行人苦之廷裕出已資五百金始爲橋又輸米二百石修乾勒橋乾勒橋當期嘉

靖二十一年姜大成為縣之日大威令於衆廷裕偕里人王用田和等集貲以成之沙埠口橋則廷裕之所獨建是尤爲難矣至明末而圯其復修者仍靳氏之人主之其後則有諸生大成大成父諸生丹秀字形庭廷裕之裔也嗜學能文和易誠樸尙信義樂施予族人爭產至割己墓以畀之人推爲長者大成亦以樂善好義敦本睦族聞故父子皆負鄉里之望當康熙時沙埠口橋益敝知縣羅其昌以是橋廷裕之始爲之其後人又克紹先志勿有替也乃招大成與之謀遂與閻楷李乾閻林集衆貲而修之迨乾隆時橋復壞則大成之子監生珦與諸生田懷珩鄉民李

起等復言於知縣傅豫而修之蓋沙埠口當南北之衝其
爲行旅之所取途與乾勒橋等重先後百餘年間修之者
咸資靳氏故其昌於大成修橋之役旣訖因旌其門曰世
德云

王大章字宗夔號東陽爲諸生敦本務學動遵古禮以節
義自許葬父母廬於墓負土成墳提學至鄆謁文廟值雨
將拜堂上大章厲聲曰拜下禮也黃安耿定向以講學自
任會試過鄆聞大章名與爲布衣交大章詣闕上安邊策
不報遂棄諸生隱居不出嘉靖四十年定向以論吳鵬事
忤嚴嵩歸大章聞往訪之會定向按甘肅去大章遂客死

黃安方湛一家定向後歸其喪祭之以文其曰以豪傑自命而俗學不齒以忠義自許而摧折不渝據其近似而不究其所至其殆依稀乎參也之魯柴也之愚亦可以得大章之爲人矣祀於鄉賢其弟子知名者曰何述

何述字明齋端慤誠樸從大章爲學能甘淡泊大章每呼之爲小友喜讀書延接後進築舍講授負笈至者相望

趙文煥字耿光其先於明初自山西洪洞縣遷於懷慶嘉靖時始遷鄺城萬曆時文煥以貢生任山西蒲州同知歲饑輸家財數千緡以賑佐州十二年貧戶力不能完賦代之納以爲常攝州事有鄧姓兄弟爭產而訟鞫之其兄知

情繼將負乃納賄於布政使某以書抵文煥爲道地文煥力持不阿縱遂忤於長官以疾歸傳四世而至桂清初以貢生入國子監大學士李天馥亟稱而欲薦之子大韶大韶字象九號荊園生有至性幼侍父疾晝夜不離側人稱其孝豪於飲能一石不亂母命節之遂終身不敢過父早歿事其兩叔恭謹其季者長大韶僅三歲迫於白首執禮未嘗懈姊適應氏早寡而貧迎歸養之教甥有成村北有先世未析地議析已受其瘠者一畝許餘以讓諸叔焉族之貧者至鬻墓木祭田知而卒復之鄰有越地刈茅者誡之曰知汝偶誤後毋復然又有求其隙地而欲貶直以

市或沮之大韶曰此吾不急之地而爲彼所急何靳爲竟應之不厚索也中子源生

源生初名六德字興一號錦崖總角入塾塾師講泰伯章羅列大全諸書源生徐曰朱子不曰夷齊讓國之心而曰夷齊扣馬之心其主讓商無疑且魯論以文王事殷爲至德泰伯之稱至德其明證也塾師聞之驚異年十四以背誦全經入學學政蔡新命至堂上解坤卦一篇歎賞之中式乾隆丙子科舉人選授湖北建始縣知縣建始好闢健訟前之令斯邑者嚴刑峻法而不能禁源生編爲忿思讎訟終凶之歌復摘現行律例繹釋刊布城市囂風爲之一

戢川楚教匪方張而建始無城源生乃捐築土城募士備火器以謀守又於各鄉場扼要修卡房選義總以維四境而覃加耀焚掠官店口衆咸以爲距城遠賊勢盛不如嚴守清江河遏其北渡爲得計源生不許乃以鄉勇夜馳三百里遲明據官店口之後山施鎗礮以相誘而自以兵出其前路擊之賊倉皇首尾不相顧皆潰遁巫山教首蕭時鐵等連川匪謀大舉以奪縣城而踞之是時大軍在襄漢咸欲馳驛請救源生曰賊所恃者外匪耳救兵如救火俟其燎原已無及矣因調各卡勇置於扼要之攔腰壩飭直北偏東各卡嚴遏內入外出之路躬率鄉兵擊之於小溪